

1445 (n. st.), 10 février – Moulins (Château).

Charles, duc de Bourbonnais et d'Auvergne, etc., commet Edouard Rousset, son conseiller, et Philibert Sotizon, son secrétaire, à recevoir et renouveler tous les dénombrements et hommages qui lui sont dus dans le Beaujolais impérial et dans les terres de Bois-d'Oingt et Riverie, à lui nouvellement advenues par le décès d'Isabelle d'Harcourt, ainsi qu'à y renouveler ou faire prêter devant notaires les reconnaissances de droits à lui dus, et faire de ceci terrier ou chartrier pour la chambre du domaine de Beaujolais. Les deux commis sont en outre chargés de pourvoir à toute anomalie qu'ils constateraient dans ledit pays, comme un fief aliéné sans l'accord du duc, un lieu, cours d'eau ou chemin public laissé à l'abandon ou occupé indûment, ainsi qu'à vérifier les registres de protocole des notaires et leur assiduité au paiement de l'émolument du sceau de la juridiction ducal, avec faculté de punir tout contrevenant ainsi que tous ceux qui refuseraient de s'acquitter de leurs tâches telles que des guets, gardes et réparations de villes ou place, et à percevoir les amendes infligées à l'issue de la procédure. Philibert Sotizon pourra accomplir ces tâches à lui seul; les deux commis recevront des gages de 15 s. t. par jour.

A. Original sur parchemin, signé, jadis scellé, avec un trou de cinq lignes dans la partie centrale.

645 x 320-360 mm. Paris, Archives nationales, P 1360/2, n° 865.

ANALYSE : *Titres de Bourbon*, II, p. 286, n° 5736.

Charles, duc de Bourbonnois et d'Auvergne, conte de Clermont et de Forez, seigneur de Beaujeu et de Chastel Chinon, per et chamberier de France. Comme pour le bien de nous et pour la conservacion de noz droiz, terres et seigneuries de nostredit païs de Beaujeuloiz du cousté de l'empire avons avisé et deliberé de faire renouveler et recongnoistre tous noz fiez, rereffiez^(a), hommaiges, souveraineté, ressort et nommees par tous noz nobles, gentilz hommes et vassaulx de nostredit païs, des villes, forteresses, chasteaulx, maisons, estangs, terres, prés, vignes, cens, servis, rentes, hommes, domaines et autres droiz que tiennent en fié, rereffiez et hommaige, souveraineté et ressort de nous en nostredit païs de l'empire, et, pour ce, nous, souffisamment informez et certiffiez des sens, loyauté, souffisance, preudomie et bonne diligence de noz amez et feaulx escuier et conseillés Eddouart Rousset, seigneur de Chamieus, et secretaire Philibert Sotizon, iceulx Eddouart et Sotizon, par deliberacion de nostre conseil et pour le bien de nous et de nostre seigneurie et conservacion de noz droiz et domaine, avons commis, deputez et ordonnez, commectons, deputons et ordonnons par ces presentes comme a ce ydoenes et souffisans a prandre et recevoir les recongnoissances de tous et chascun de nosdiz fiez, rereffiez, hommaiges, ressort, souveraineté et nommees de nosdiz feaulx vassaulx, gentilz hommes et autres de nostredit païs en la partie de l'empire a nous deuz et appartenans tant a cause de nostre segneurie dudit Beaujeuloiz que autrement, et iceulx

fiez, rereffiez, souveraineté, ressort, hommaiges et nommees renouvelés et de nouvel par nosdiz feaulx vassaulx et autres tenans de nous comme dit est a fiez, rereffiez, foy^(b) et hommaiges, villes, places, forteresses, chasteaulx, terres, cens, servis, rentes, seigneuries, justices, maisons, terres, prés, estangs, molins, vignes, domaines et autres biens et droiz quelxconques fere confesser, recongnoistre et mettre par escript, en fere livres et terriers ainsi qu'ilz devront et chascun d'eulx seront tenuz de faire, et a faire confesser, renouveler et recongnoistre a nosdiz feaulx vassaulx et autres tous et chascun leurs servis, cens, rentes directes, recongnossances, tailles, mains mortes, servitudes^(c) et autres droiz a iceulx nosdiz hommes, feaulx vassaulx et autres deuz et appartenans quelxconques par tous hommes sers et non sers, tenemenciers et autres estans et mouvans, et que tiennent de nous en fiez, rereffiez, hommaiges, souveraineté et ressort et aussi tous autres quelxconques qui soient et leur appartiennent en quelque maniere que ce soit en nostredit país de l'empire et dedans noz terres, seigneuries, mendemens, ressorts, souverainetés d'icellui pardevant nosdiz commis et telz notaires, ung ou plusieurs, que a ce besoing leur sera et voudront eslire ou commectre, et iceulx cens, servis, hommes, directes tailles, mains mortes, servitudes et autres droiz dessusdiz, et les confessions et recongnossances que sur ce se feront a tous et chascun de nosdiz gentilz hommes, feaulx vassaulx et autres, et a un chascun comme lui appartiendra, tout en ung livre et terrier, ou plusieurs livres, terriers, chartrés^(d) et ententes pour nous, et aussi pour eulx mettre et reddiger ou fere mettre et reddiger par escript receues et signees par lesdiz notaires, c'est assavoir tous ceulx qui se tiendront de nous et de nosdiz fiez, hommaige, souveraineté et ressort, d'une part particulièrement, et tous autres qui seront deuz, de l'autre, et de tout fere ou faire fere terriers, chartrés, livres et ententes qui se doubleront et voulons estre doublees et baillees, c'est assavoir l'un desdiz doubles pour nous et estre porté et envoyé par nosdiz commis en nostre chambre de nostre domaine dudit Beaujeuloiz a Villefranche, et l'autre pour un chascun de nosdiz gentilz hommes, feaulx vassaulx et subgiés et autres a qui appartiendront, aux gaiges, toutesfoiz despens, charges et journees desdiz gentilz hommes, feaulx et vassaulx, desquelx seront contens et paieront raisonnablement nosdiz commis; et aussi les avons commis pareillement a renouveler, recevoir et faire confesser et recongnoistre tout et chascuns noz cens, servis, tailles, mains mortes, recongnossances, hommes serfz, servitudes et autres droiz a nous deuz et appartenans en nostredit país de l'empire, quelque part que ce soit, et pareillement es lieux et terres du Boys et de Reverie a nous avenues par la succession de belle tante la dame de Villars^(e), par tous et chascun noz^(f) hommes serfz, non serfz, tenemanciers, possesseurs et autres et chascun tant comme il sera tenus et devra faire par raison ou yceulx pardevant nosdiz commis et notaires telz que a ce voudront estre ou commettre ung ou plusieurs fere confesser et recongnoistre et tout mettre et reddiger par escript en chartiés, livres et terriers, ung ou plusieurs, et puis icelles signees et tabellionnees comme besoing sera et appartiendra, porter, mettre ou envoyer feablement en nostredictie chambre de domaine de nostredictie ville de Villefranche audit Beaujeuloiz, a noz despens et journees qui seront paiees et tauxees a nosdiz commis comme après est declairé; et aussi, se en procedant par nosdiz commis a ces choses et a l'exercice de ceste leur commission ilz treuvent aucuns fiez ou rereffiez, hommaiges, hommes serfz, cens, servis, terres, domaines ou autres droiz

quelxconques estans de noz fiez, rereffiez et hommaiges, lesquelx aient esté venduz, afranchiz ou alienés sans nostre congé et licence, a nostre prejudice et amoindrement de noz fiez, reteffiez, hommaiges et seigneurie, les avons commis a les prendre, retenir, appliquer et adjuger a nostre domaine et seigneurie, et a iceulx hommes, servis, rentes, servitudes et autres droiz fere confesser et recongnoistre a nous, et aussi les terres, maisons, prés, vignes, estangs, et autres droiz de domaines et heritaiges se mestier est de nouvel bailler et asserviser^(g) pour nous, le mieulx et plus prouffitablement que fere se pourra ou devra a servis annuelz pour ce a nous devoir paier dores-enavant, et pour ce aussi lesdiz vendeurs et achateurs fere venir pardevant^(h) nosdiz commis, mettre en cause, at-taindre et traire a emandes et compositions comme fere se pourra et devra par raison et selon les usances et coustume dudit païs de l'empire, et icelles emandes et compositions lever et recevoir sur iceulx, d'icelles donner quittances valables, et, se pour ce debat ou question en advient entre les parties, a les oÿr, en cognoistre, leur fere et administrer tout justice et raison; et semblablement, se nosdiz comis, en procedant a l'exercice de leurdicte commission, treuvent aucuns chemins publiques, cours d'eaues, lieux, max⁽ⁱ⁾, tenemens et possessions vacans ou hermes^(j), iceulx avons commis et com-mectons a les prendre et appliquer a nous et a nostre domaine, asserviser et bailler de nouvel a cens et servis a nous doresenavant a paier au^(k) prouffit de nous le mieulx que fere se pourra, et, avecques ce, se nosdiz commis treuvent aucuns max, tenemens, terres, heritaiges, possessions, cours d'eaue, chemins ou autres choses et droiz a nous appartenans de nouvel baillé indeuement et au prejudice de nous et de la chose publique, de icelle [chose^(l)] reprendre, adjuger et appliquer a nous ou lesdiz chemins remettre a l'utilité de la chose publique tant que besoing sera et faire se devra, et icelles choses rebailier et reasserviser aux detenteurs d'icelles ou a autres [asservie...*(trou de plusieurs mots)*] et^(m) plus a prouffit que fere se pourra pour nous par raison; semblablement aussi, se nosdiz commis treuvent aucun chemins publiques, cours d'eaues ou autres choses en nostredit païs prises ou occuppees par *(trou de plusieurs mots)* chemins rompuz, bouchez ou foussoyés par aucuns et traversés par cours d'eaues ou autres, nous lez avons commis a les repareiller ou faire repareiller, et ceulx qui les auroient occupés, rompuz ou procedé a ces choses sans *(trou de plusieurs mots)* souffisant de nous, les traire et actaindre pour ce en cause, et contre iceulx adjuger et lever emendes a nous raisonnablement; et aussi, de nouvel, se besoing est, iceulx chemins, cours d'eaues, fossés et autres choses bailler a cens et servis *(trou d'un mot)* le mieulx que fere se pourra; et ce aussi nosdiz commis treuvent aucuns noz hommes justicables et subgiez et autres demourans en autre seigneurie du cousté de l'empire qui soient rebelles ou contredisans a contribuer et fere leur devoir avecques les autres noz hommes des lieux, chastellenies et mandemens esquelx sont demourans, tant en guetz et chargues, cappitanages, fortiffications, reparacions de villes, places, terres et mandemens esquelx habitent et aussi en taux, dons, taillez et subsides comme autrement, les avons commis et com-mettons a les fere contribuer es choses dessusdictes et toutes autres deues et raisonnables, et de leur fair fere tous devoirs comme font les autres; et aussi pareillement de fere contribuer es choses dessusdictes et en toutes autres raisonnables et deues tous autres que trouveront et congnoistront a icelles estre tenus tant pour raison de leurs personnes et biens comme autrement, ainsi que devront

fere et seront tenus par raison ; et, oultre ce, se nosdiz commis treuvent aucuns qui aient commis aucunes calompnies ou decepions es pris et achaps d'aucunes choses estans de nostre directe ou qui aient cellé⁽ⁿ⁾ ou retenu les los et ventes pour ce a nous deuz et appartenans, et tous a ce adherens et consentans, a les en traire en cause et fere venir par devant eulx, et pour ce avons adjudier emandes sur eulx deuez raisonnables^(o) ; et, avecques ce, les avons commis que tous les notaires dudit Empire, noz jurez et subgiés, qu'ilz trouveront avoir receues lettres ou instrumens en nostredit païs sans y adjouster le seelle de nous, ou qui les auront expediees et rendues aux parties sans fere seeller et payer l'emolument de nostre seel et qui n'auront aussi enregistrees toutes leurs lettres et contraulx en prothecolles, d'eles en actaindre et traire en emandes et compositions, et icelles lever d'iceulx en rapportant tout ce que par eulx sera fait par devans noz officiers en nostre chambre des comptes et la ou il appartiendra, ensemble l'emolument de nostre seel et autres droiz a nous appartenans ; et en ce que touche ledit^(p) Eddouart Rousset, l'un de nosdiz commis, avons commis et connectons ledit Sotizon seul et pour le tout a fere les choses touchant et concernant ledit Rousset comme dessus ; ausquelx nos commis a fere, excercer et executer les choses dessusdictes et chascune d'elles leurs circonstances et deppendences quelxconques, avons donné et octroyé, donnons et octroyons par ces noz presentes, auctorité, pouvoir, commandement et mandement especial en obstant de ces choses, et deffendent tout entremise et cognoissance a tous autres noz justiciers, officiers et gens quelx qu'ilz soient ; et avecques ce avons donné et octroyé puissance et auctorité a nosdiz homes de contraindre et compeller pour les choses dessusdictes toutes et chacunes leurs circonstances et deppendences, toutes et chacunes selon ce que un chascun touchera par prinse, saisine et nostre mains mise de leurs biens, prise, detencion, arrest et enprisonnement de leurs personnes, multes somacions, adjudicacions et lieues de peines, confiscacions et adjudicacions de leurs biens, et mesmement de ceulx qui tiendront en fié, rereffié et hommaige de nous ou autrement, et par toutes autres voyes les plus fortes que pourront ; lesquelx aussi noz commis pour ces choses fere et executer auront et prandront et chascun d'eulx de nous tant pour journees comme despens pour chascun jour qu'ilz entendront et besougeront pour nous es choses dessusdictes et leurs circonstances qui nous touchent, tant seulement la somme de quinze soubz tournoys^(q) que leur voulons et ordonnons estre payee sur les deniers de leur recepte que feront sur ce, ou autrement sur les deniers de noz receptes de par dela, ensemble les grosses^(r) et escriptures qui se feront par lesdiz notaires de nosdiz cens, servis et autres drois selon raisonnable tauxacion qui se fera d'icelles par nostre amé et feal conseiller le juge dudit Beaujeuloys, a ce commis par nous. Si mandons, commandons et etroitement, enjoignons par sesdictes presentes a noz amez et feaulx conseillers les bailli, juge, maistre des eaues et fourests, procureur, tresorier, cappitaines et gouverneurs de places, villes et chasteaulx, chastellains, prevostz, receveurs, chassipolz, sergens et a tous autres noz justiciers, officiers et subgiés de nostredit païs de Beaujeuloiz et aussi a tous autres a qui appartiendra que es choses dessusdictes, leurs circonstances et deppendences quelxconques a nosdiz commis et deputés obeissent et entendent en ceste partie, baillent et delivrent noz presens, donnent conseil, confort et aide se mestier leur est, sans contredit ou difficulté, en leur deffendant pas cesdictes presentes que esdictes choses ne s'entremettent aucunement, donnent

empeschement, destorbier ou retardament quelxconques a nosdiz commis en quelque maniere que ce soit, en tant qu'ilz doubtent encourir nostre indinacion faisant le contraire, car ainsi nous plaist il et voulons estre fait, nonobstant quelxconques lettres subreptices impetrees ou a impettrer a ce contraires. Donn  en nostre chastel de Molins le X^{eme} jour de fevrier, l'an de grace mil quatre cens [quarante^(s)] et quatre.

Par monseigneur le duc en son conseil.

(Sign  :) Gon.

^(a) rereffiez *sic* (*arri re-fiefs*).

^(b) foy  crit par dessus un grattement.

^(c) servitutes *sic* (*servitudes*).

^(d) chartres *sic* (*chartriers*).

^(e) Il s'agit de deux seigneuries l gu es par Isabelle d'Harcourt, dame de Thoirs-Villars, de Riverie et de Bois. Aujourd'hui Riverie et Le Bois-d'Oingt (Rh ne).

^(f) noz  crit par dessus un grattement.

^(g) asserviser *sic* (*asservisser*).

^(h) pardevant r p t .

⁽ⁱ⁾ max *sic* (*mas, domaine rural*).

^(j) hermes : lieu inculte.

^(k) a paier au suivi d'une rature illisible, peut- tre terme.

^(l) chose : partie basse d chir e par le trou central.

^(m) et suivi par une rature.

⁽ⁿ⁾ cell  (*sceller*) pour dissimuler.

^(o) emandes sur eulx deuez raisonnables *sic*.

^(p) et en ce qui touche ledit  crit par dessus un grattement.

^(q) La somme,  crite dans une encre plus fonc e, a visiblement  t  rajout e apr s la fin de la r daction.

^(r) grosses de grossare (*exp dier*), ici dans le sens d'un acte sous forme d'exp dition ou minute.

^(s) quarante : milieu du mot d chir .

 dition : Olivier Matt oni et Jean-Damien G n ro.

Ce document PDF a  t  compil  en juillet 2024 dans le cadre du programme de recherche public « Actes princiers au royaume de France (XIV^e-XVI^e si cle) », port  par le Laboratoire de m di vistique occidentale de Paris (UMR 8589 CNRS-Universit  Paris 1 Panth on-Sorbonne) sous la direction scientifique d'Olivier Matt oni, professeur des universit s (Paris 1), et dont les partenaires sont le Laboratoire d'Excellence « Histoire et anthropologie des savoirs, des techniques et des croyances » (LabEx hastec), le Centre Jean Mabillon (EA 3634/  cole nationale des chartes), le Centre de recherches historiques (UMR 8558/ CNRS-EHESS) et les Archives nationales de France. La transcription et l'appareil critique du pr sent acte sont mis   disposition sous [Licence Ouverte V 2.0](#).

Pour plus d'information, consultez le site Actes princiers (actesprinciers.huma-num.fr).